



JUDICIAL SYSTEM MONITORING PROGRAMME

PROGRAMA MONITORIZASAUN SISTEMA JUDISIÁL

Komunikadu Imprensa

30 Abril 2013

Prokurador Jerál da Repúblika dezafia JSMP atu halo kritika ba produtividade servisu atutór judisiáriu sira hodi bele hametin sistema justisa

Iha 29 Abril 2013, Programa Monitorizasaun Sistema Judisial (JSMP) marka audiênsia ho Prokuradór Jerál da Repúblika iha Eskritória Prokuradóra Jerál da Repúblika iha, Rua de Colmera, Dili.

Audiênsia ne'e ho objetivu atu kongratula Prokurador Jerál da Repúblika (PJR) ba ninia pozisaun foun, diskute mós asunto importante balu relasiona ho utilizasaun artigu ba krime violénsia doméstika, inestu, krime pasadu, kazu korrupsaun, inklui kazu pendente sira.

Audiênsia ne'e hanesan mós audiênsia seluk ne'ebé antes ne'e JSMP halo ona ho Prokuradora Jerál Sesante Digníssima Dra. Ana Pessoa Pinto, iha tinan kotuk.

“JSMP hanoin katak asunto hirak ne'e importante tanba ne'e husu atu PJR bele konsidera asunto hirak ne'e sai mos hanesan agenda prioridade durante mandatu tinan haat ba oin”, dehan Diretór Ezekutivu JSMP, Luis de Oliveira Sampaio.

Iha parte seluk Digníssimo Dr. José Ximenes ho kontente simu equipa JSMP ho ideas no preokupasaun sira husi JSMP ne'ebé konsidera mos hanesan agenda prinsipal iha ninia mandatu. Prokurador Jerál mos haktuir katak asunto hirak ne'ebé JSMP hato'ó, sai mós hanesan preokupasaun husi Prokurador Jerál.

Relasiona ho kazu violénsia doméstika PJR halo ona koordinasaun ho prokurador distrital atu bele hare no fo prioridade ba kazu refere tanbá kazu ne'e sempre akontese mai husi familia.

Liu tan, hare ba preokupasaun hirak ne'e PJR husu no enkoraza nafatin JSMP atu kontinua halo knaar kritiku hodi tau matan ba vitima sira husi kazu violénsia doméstika, no kazu korrupsaun sira no servisu Ministériu Públiku en jerál.

Prokurador Jerál dezafia JSMP atu halo kritika ba produtividade servisu atutór judisiáriu sira hodi bele hametin ita nia sistema justisa.

Enkontru ne'e taka ho entrega relatóriu JSMP rua ba Prokurador Jerál da Repúblika kona-ba *Observasaun Jerál Setor Justisa 2012 no Relatóriu Institusionál JSMP 2012*.

Atu hetan informasaun kompletu bele kontaktu direktamente:

Luis de Oliveira Sampaio

Diretór ezekutivu JSMP

Diresaun e-mail: luis@jsmp.minihub.org

Telephone : 3323883/77295795

www.jsmp.tl